



Broj/Број: 01/7-50-1-53-2-16/04
Sarajevo/Сарајево: 08.06.2004.

ZAPISNIK

sa 16-e sjednice Administrativne komisije Predstavničkog doma Parlamentarne skupštine Bosne i Hercegovine, održane u prostorijama institucija Bosne i Hercegovine dana 08.06.2004 godine sa početkom u 13,15 sati. Sjednica je završena u 14,30 sati.

SJEDNICI SU PRISUSTVOVALI ČLANOVI KOMISIJE: Jusufović Munib, Zorić Vinko, Kragulj Nikola, Ušanović Mubera, Križanović Jozo, Ivo Miro Jović, Felić Hazim;

OPRAVDANO ODSUTNI ČLANOVI: Blagojević Mirko, Novaković Momčilo;

OSTALI PRISUTNI: Vedran Hadžović Sekretar Zajedničke službe Sekretarijata Parlamentarne skupštine Bosne i Hercegovine; dr Zlatko Lagumdžija, predlagač Rezolucije po tački AD-2 dnevnog reda;

Šesnaestom sjednicom, Administrativne komisije Predstavničkog doma Parlamentarne skupštine Bosne i Hercegovine, **predsjedavao je Munib Jusufović predsjedavajući** Administrativne komisije Predstavničkog doma Parlamentarne skupštine Bosne i Hercegovine.

Za sjednicu je predložen slijedeći:

DNEVNI RED:

1. Usvajanje Zapisnika sa 15-e sjednice Administrativne komisije;
2. Razmatranje "Rezolucije o povlačenju iz procedure i uvođenju privremenog petogodišnjeg moratorijuma na sve zakone i odluke kojima se uvode nove privilegije izabranih dužnosnika u izvršnoj i zakonodavnoj vlasti" dr Zlatka Lagumdžije, po zaključku sa 15-e sjednice Administrativne komisije ;
3. Razmatranje Zahtjeva predsjedavajućih Klubova poslanika za iznalaženje prostora za rad Klubova i to:
 1. -Mješovitog kluba poslanika;
 2. -HDZ-Demokršćani;
 3. -Srpske demokratske stranke;
4. Razmatranje Zahtjeva za odobrenje naknade za odvojeni život i smještaj poslanika Mubere Ušanović;

Pošto je predsjedavajući otvorio 16-u sjednicu Administrativne komisije upoznao je prisutne sa predloženim dnevnim redom i pozvao ih ukoliko imaju dopuna dnevnog reda da iste predlože. Sekretar Zajedničke službe Sekretarijata Parlamentarne skupštine Bosne i Hercegovine Vedran Hadžović je predložio da se u dnevni red uvrsti tačka **AD-5 Razno** u okviru koje bi se razmotrila određena aktuelna pitanja.

Po završenoj raspravi o predloženom dnevnom redu za 16-u sjednicu Administrativne komisije, predsjedavajući Munib Jusufović je dao na glasanje utvrđeni dnevni red sa predloženom tačkom AD-5 Razno. **Dnevni red sa predloženom izmjenom usvojen je jednoglasno.** Pošto je usvojen dnevni red, pristupilo se razmatranju istog, po pojedinim tačkama.

AD-1 Zapisnik sa 15-e sjednice Administrativne komisije, usvijen je jednoglasno bez primjedbi.

AD-2 Uvodno izlaganje po ovoj tački dnevnog reda dao je Vinko Zorić predloživši da se Rezolucija povuče, budući da je njegovo mišljenje da ista nije aktuelna u vremenu. Nakon uvodnog izlaganja imenovanog, predsjedavajući Munib Jusufović je, obzirom da predlagač još nije bio došao na sjednicu iako je uredno pozvan, **dao dva prijedloga i to: da se Rezolucija razmatra bez prisustva predlagača ili da se odgodi rasprava po Rezoluciji za narednu sjednicu Administrativne komisije.**

Za riječ se zatim javio Jozo Križanović i istakao, da je sadašnja formulacija Rezolucije u skladu sa onim što je usaglašeno sa predlagačem na 15-oj sjednici Administrativne komisije, pa nevidi razloga da se ista ne razmatra na današnjoj sjednici. **Posebno je istakao, da je smisao Rezolucije da se uputi poruka svim korisnicima budžetskih sredstava uključujući i javne fondove, tako da bi bilo dobro da Predstavnički dom prihvati jednu ovakvu Rezoluciju.**

Nakon ove diskusije, predsjedavajući Munib Jusufović je istakao, da se slaže sa ciljem i duhom Rezolucije i naglasio da u Rezoluciji tačke 2, 3, 4 i 5 nisu sporne, ali je sporna tačka 1. Postavio je pitanje članovima Administrativne komisije, da li ima Administrativna komisija nadležnost, obzirom da je Administrativna komisija ušla u proceduru po pitanju Zakona o pravima i dužnostima članova Parlamentarne skupštine Bosne i Hercegovine i da se po tom pitanju stalo kod Doma naroda Parlamentarne skupštine Bosne i Hercegovine, da sad ulazi u nadležnost Predstavničkog doma Parlamentarne skupštine Bosne i Hercegovine? **Istakao je, da je Administrativna komisija kao nadležna po ovom pitanju, citirani Zakon dala u proceduru i sa istom se stalo, s tim da je Dom naroda u tom pogledu otišao s procedurom dalje od Administrativne komisije. S ovim se otvara pitanje, da li to znači da se oduzima pravo nadležnim komisijama da rade svoj posao i da li će se raspravljati pet sati o tome da li naprijed navedenom odgovara rečenica "ovaj moratorij...." ?**

Pošto su otvorena pitanja po spornoj tački 1 Rezolucije, za riječ se ponovo javio Vinko Zorić, postavivši pitanje kome je to loša socijalna situacija i da li će se ista popraviti ukoliko se smanje plaće poslanicima ?

Replicirao mu je Jozo Križanović, istakavši da se socijalna situacija hoće popraviti ukoliko se nebudu uvodile nove privilegije. Vratio se tekstu Rezolucije skrenuvši pažnju da, **to upravo naglašava Rezolucija u tački 1 kojom se uvodi moratorij na uvođenje novih privilegija i na taj način upravo sprečava da se iste uvedu.**

Na ovo izlaganje je replicirao Munib Jusufović stavljajući ponovo naglasak na ulogu Komisija. Postavio je pitanje, da li se tačkom 1 ograničava pravo Komisija i da li to znači da Komisije ne mogu koristiti svoje zakonsko pravo ? Da li to ujedno znači, da treba da Komisije ukinu svoje odluke, pa je s toga veoma ozbiljna tačka 1. Nadalje je istakao, **da ukoliko se ostaje pri tome da ostaje tačka 1 Rezolucije, on si zadržava pravo da na istu izuzme svoje mišljenje.**

Posebno se u svojoj diskusiji osvrnuo na ulogu Doma naroda, pitajući se, da li će isti prihvatiti tačku 1 Rezolucije.

Za riječ se ponovo javio Jozo Križanović. Podsjetio je članove Administrativne komisije da je Kolegij ovlastio Administrativnu komisiju da pripremi citirani Zakon. Identično tome članovi Administrativne komisije pripremaju Rezoluciju za Predstavnički dom Parlamentarne skupštine Bosne i Hercegovine.

Po ovoj diskusiji, riječ je tražio Vinko Zorić i naglasio, da se na 15-oj sjednici Administrativne komisije nije preciziralo šta u smislu ove Rezolucije znači "nove privilegije"?

Učešće u diskusiji, po pitanju značenja tačke 1 Rezolucije, zatim je uzeo Nikola Kragulj. Podsjetio je prisutne da se na 15-oj sjednici Administrativne komisije po ovoj tački dnevnog reda raspravljalo sat vremena i da je Rezolucija napisana upravo onako kako su se usaglasili na 15-oj sjednici Administrativne komisije. U skladu sa naprijed navedenim tačka 1 je u načelu tako dogovorena, pri tome istakavši, da članovi Administrativne komisije nisu bili informisani o proceduri citiranog Zakona. Naglasio je, da se pri utvrđivanju teksta Rezolucije smatralo, u Administrativnoj komisiji, da je Zakon umiren, te da se isti može povući, a da se u isto vrijeme može ići u proceduru sa novim Zakonom shodno ovoj tački s tim, da se ne uvode nove privilegije. U cijeloj stvari se željela poslati jedna poruka prema Predstavničkom domu da se ni u jednoj budžetskoj instituciji ne povećavaju osobna primanja.

Nakon ovog izlaganja Munib Jusufović je ponovo podsjetio prisutne članove, da je Dom naroda u proceduri oko citiranog Zakona otišao mnogo dalje. Istakao je, da se u Predstavničkom domu navedeni Zakon zaustavio pri Ustavno-pravnoj komisiji, a da je Dom naroda u proceduralnom smislu otišao još dalje. Ponovo je podvukao da nisu sporne tačke 2, 3, 4 i 5 Rezolucije već je sporna tačka 1 u oba segmenta i to iz naprijed navedenih razloga i pitanja sukoba nadležnosti. Sporana je također i drugi dio tačke 1 gdje stoji da će Parlamentarna skupština Bosne i Hercegovine morati donijeti odluku o ukidanju moratorijuma.

U toku naprijed navedene rasprave na sjednicu je došao predlagač Rezolucije poslanik dr Zlatko Lagumdžija. Predsjedavajući Munib Jusufović je upoznao predlagača Rezolucije sa dosadašnjim tokom rasprave. Naglasio je, da postoje po ovom pitanju slijedeća rješenja i to: da se Rezolucija prihvati u cijelosti, da se Rezolucija prihvati u dijelu koji nije sporan, a to su tačke 2, 3, 4 i 5 i da se Rezolucija odbaci kao neprihvatljiva. Jusuf Munibović je naglasio, da je između ostalog sporan i sam naziv Rezolucije.

Po ovom uvodnom informisanju o toku dosadašnje rasprave, predlagač Rezolucije dr Zlatko Lagumdžija je istakao, da je došao da kaže Administrativnoj komisiji da je napisao ono što se usvojilo na 15-oj sjednici Administrativne komisije. Ujedno je postavio pitanje, da li postoji saglasnost u Administrativnoj komisiji da je tekst Rezolucije ono što se dogovorilo na citiranoj sjednici? Istakao je, da je on usaglašen tekst samo stavio u formu, pa sad želi postaviti pitanje kako se misli izaći iz novonastale situacije u proceduralnom smislu?

Nakon izlaganja predlagača Rezolucije za riječ se javio Vinko Zorić. Ponovo je u svojoj diskusiji istakao pitanje, o kakvim se lošim socijalnim-ekonomskim uvjetima u Rezoluciji govori, posebno naglasivši, da se na 15-oj sjednici raspravljalo o moratorijumu po pitanju njegovog trajanja tj. neograničeno moratorij ili da se isti prekine nekom odlukom kao što je na 15-oj sjednici objasnio predlagač dr Zlatko Lagumdžija.

Na ovu diskusiju Munib Jusufović je predložio, da se u prvoj tački Rezolucije kaže, da se moratorij odnosi na lična primanja, budući da se tekstom tačke 1 Rezolucije oduzima legitimno pravo poslanika da predlaže zakone. Ponovo je naglasio, da je njegov stav da se zamrznu plaće obzirom na ekonomsko-socijalnu situaciju.

Predlagač Rezolucije dr Zlatko Lagumdžija je pojasnio namjeru tačke 1 Rezolucije, u smislu, da se citirani Zakon u tački 1 povlači, ali da to ne znači da se ne može donijeti novi!

Munib Jusufović je ponovo naglasio, da po njemu nisu sporne tačke 2, 3, 4 i 5 već je za njega sporna cijela tačka 1.

Za riječ se javio Felić Hazim sugerišući da se tačka 1 promatra sa stanovišta, šta ona znači za Dom naroda. U tom smislu je i postavio pitanje, može li se voditi rasprava u smijeru da se prva tačka usaglasi na zajedničkoj komisiji oba Doma ?

Dr Zlatko Lagumdžija je naglasio, da se i ovakav prijedlog može prihvatiti, ukoliko će to doprinjeti da se ova tačka riješi!

Ponovo je uzeo riječ Munib Jusufović i predložio, da se prihvate četiri tačke Rezolucije koje nisu sporne.

Ovaj prijedlog je podržao Vinko Zorić naglašavajući, da tačka 2 u stvari obavezuje sve komisije po pitanjima navedenim u tački 1. S ovom konstatacijom složio se i Munib Jusufović.

Na naprijed navedenu diskusiju javio se dr Zlatko Lagumdžija sa prijedlogom, da se u tački 1 Rezolucije briše tekst "povlači iz Parlamentarne procedure Zakon o pravima i dužnostima članova Parlamentarne skupštine i ".

Nakon ovog prijedloga Munib Jusufović je predložio, da se prva tačka izbacij, a da tačka 2 bude tačka 1 Rezolucije.

Vinko Zorić je u naprijed navedenom kontekstu naglasio, da Parlamentarna skupština Bosne i Hercegovine ne može biti talac jedne Rezolucije. Istakao je, da su poslanici dužni voditi računa o svim aktuelnim pitanjima i u skladu sa tim donositi zakone.

Dr Zlatko Lagumdžija je potvrdio izneseno mišljenje, naglasivši, da se ipak netrebaju uvoditi nove privilegije.

Felić Hazim je predložio, da se u tom slučaju naglasi, da se uvodi moratorij na sve zakone koji uvode nove privilegije.

Munib Jusufović je ponovo istakao prijedlog, da se usvoje tačke 2, 3, 4 i 5, te da se vidi treba li usaglašavati sa Domom naroda tačku 1 ? Naglasio je ponovo, da je sporan i sam naziv Rezolucije, kao i prijedlog dr Lagumdžije da se briše tekst " povlači iz....itd." po pitanju, šta se uradilo tim potezom, te tražio objašnjenje, kako će se i u kojoj formi pojaviti inicijativa od poslanika, ako ostane riječ moratorij ? Smatra da predlagač dobro zna, šta čini ovim potezom u tački 1.

Vinko Zorić je nakon ovog izlaganja istakao, da je on protiv Rezolucije. Smatra, da se Administrativnoj komisiji oduzimaju prava utvrđena članom 42 stav 1 tačka (a) Poslovnika Predstavničkog doma Parlamentarne skupštine Bosne i Hercegovine ("Sl.glasnik BiH" br.: 20/00), a to znači da, Administrativna komisija neće raditi dok Parlament ne donese odluku. Istakao je, da se želi Rezolucijom regulisati ono, što se reguliše zakonom. Predlaže, da se u tačku 1 unese, da će Administrativna komisija biti ta, koja će dati razlog, da se donese odluka kojom se prekida moratorij.

Nakon ovog prijedloga, za riječ se javio Ivo Miro Jović i predložio da se tačka 1 Rezolucije modificira na način, da bude uvođenje maratorijuma na sva dalja povećanja na lična primanja izabranih dužnosnika u izvršnoj i zakonodavnoj vlasti.

Predlagač Rezolucije dr Zlatko Lagumdžija je prihvatio navedeni prijedlog da se u tekst tačke 1 iza teksta "uvodi moratorij na sve zakone i odluke kojima se uvode" unese tekst " povećanja osobnih primanja," a da se tekst "nove privilegije" briše. Dr Zlatko Lagumdžija je također predložio, da se iz naslova Rezolucije briše tekst "povlačenju iz procedure" a da se usvoji prijedlog, da se umjesto teksta "nove privilegije" unese tekst "povećanja osobnih primanja."

Ivo Miro Jović je, u smislu svoje naprijed navedene diskusije istakao, da Rezolucija nije odbačena, a važno je, da se nešto za ljude odradilo i time se odaslala jedna pozitivna poruka. Smatra da se predloženim kompromisom izašlo u susret i komisijama budući da, ova Rezolucija ima smisla.

Opet se javio predlagač Rezolucije pitanjem, šta navedeni prijedlog znači sa stanovišta cigtiranog Zakona?

Ivo Miro Jović je odgovorio, da to znači, da se ostavi Zakon koji reguliše ovu problematiku.

Munib Jusufović je dopunio pojašnjenje u tom smislu, da to znači, da će se pojaviti više verzija o kojim će se moći raspravljati.

Dr Zlatko Lagumdžija kao predlagač Rezolucije je zatim istakao, da po datim sugestijama u tački 1 iza teksta Predstavnički dom, dakle, treba brisati tekst **“povlači iz.....i”**, pa ide tekst **“uvodi moratorij na sve zakone i odluke kojima se uvode”** pa se briše tekst **“nove privilegije”**, a umjesto njega unosi tekst **“povećanja osobnih primanja.”**

Zatim je Ivo Miro Jović predložio dalji tekst tačke 1 **“Ovaj moratorij traje dok se odlukom nadležnih tijela ne konstatuje, da su se poboljšale ekonomske i socijalne prilike zbog kojih je donesena ova Rezolucija”**.

Nakon ovog prijedloga druge rečenice teksta tačke 1 Rezolucije, isti je pročitao prisutnim članovima Administrativne komisije Munib Jusufović.

Dr Zlatko Lagumdžija je također pročitao tekst, te predložio da ga pročita i predsjedavajući Administrativne komisije.

Pošto su usaglašeni i usvojeni prijedlozi za izmjene i dopune Rezolucije, na Administrativnoj komisiji je pročitan tekst naziva Rezolucije i tačke 1, tako da usaglašen tekst Rezolucije na 15 i 16-oj sjednici predlagača dr Zlatka Lagumdžije glasi:

REZOLUCIJA

o uvođenju moratorijuma na sve zakone i odluke kojima se uvode povećanja osobnih primanja izabranih dužnosnika u izvršnoj i zakonodavnoj vlasti

1. Predstavnički dom uvodi moratorij na sve zakone i odluke kojima se uvode povećanja osobnih primanja izabranih dužnosnika u izvršnoj i zakonodavnoj vlasti. Ovaj moratorij traje dok se odlukom nadležnih tijela ne konstatuje da su se poboljšale ekonomske i socijalne prilike zbog kojih je donesena ova rezolucija.
2. Pozivaju se sve institucije BiH, kao i nadležne komisije i tijela tih institucija da preispitaju svoje odluke donesene u protekloj godini o povećanju ličnih primanja u skladu sa ovom rezolucijom i na bazi analize koju će sačiniti Vijeće ministara o ekonomskom i socijalnom stanju u zemlji.
3. Vijeće ministara će o realizaciji ove rezolucije izvještavati Parlamentarnu skupštinu u zadnjem tromjesečju svake godine kako bi se moglo vršiti usklađivanje ličnih primanja izabranih dužnosnika u državnim institucijama i javnim preduzećima isključivo u skladu sa rastom GDP i ukupnom ekonomskom i socijalnom situacijom u zemlji u skladu sa strategijom PRSP.
4. Poziva se Vijeće ministara da cjelovito i u skladu sa zaključkom doma donesenim pri usvajanju budžeta za 2004. godinu i u skladu sa ovom rezolucijom zakonski uredi prava i dužnosti svih budžetskih korisnika.
5. Predstavnički dom upućuje poziv institucijama na svim nivoima kao i javnim preduzećima, da daju doprinos stabilizaciji ekonomskih kretanja primjenom ovdje iznesenih principa u svojim sredinama.

Pošto je pročitan usaglašen tekst Rezolucije, prije nego je ista data na glasanje, predsjedavajući sjednicom Administrativne komisije je naglasio, **da se u dobronamjernom duhu kao znak dobre volje može posmatrati ova Rezolucija jer se šalje poruka, da se zamrzavaju**

povećanja osobnih primanja izabranih dužnosnika dok traju nepovoljne ekonomsko-socijalne prilike.

Nakon ovog izlaganja, usaglašeni tekst prijedloga Rezolucije je dat na glasanje. Prisutni članovi Administrativne komisije su, **sa 6 glasova za i 1 protiv, usvojili prijedlog Rezolucije u naprijed navedenom tekstu.**

AD-3 Po ovoj tački dnevnog reda je naglašeno, da je ista **vezana uz tačku AD-5 Razno.** Predsjedavajući Munib Jusufović je naglasio, **da na osnovu dostavljenog snimka raspoloživog prostora izgleda da nema, trenutačno vidljivog rješenja.**

Nakon ove konstatacije, za riječ se javio Zorić Vinko i istakao, da on već drugi put podnosi zahtijev za dodjelu prostora za rad Kluba. Smatra, da je potcjenjivački pričati da nema prostora, te da je **Snimak prostora** dostavljen od stručnih službi **netačan.** Istakao je, da je vidio vrata na kojim piše Klub SDP. Ističe, da je neko ispred stručnih službi napisao da je Klub HDZ-a u predsoblju, pa iz tog jasno proizilazi, da Klub HDZ-Demokršćani nema nikakvu prostoriju za razliku od Kluba SDS-a.

Nakon obrazlaganja zahtjeva predsjedavajućeg Kluba HDZ-Demokršćani, Munib Jusufović je uputio pitanje Sekretaru Zajedničke službe Parlamentarne skupštine Bosne i Hercegovine, **da li Klub SDS-a ima ikakvu prostoriju za rad Kluba ?**

Sekretar Zajedničke službe, Parlamentarne skupštine Bosne i Hercegovine, Hadžović Vedran **je obrazložio trenutno stanje sa prostorom,** te istakao da Klub SDS-a trenutno koristi prostor u kojem sjedi Milan Zjajić.

Potom se za riječ javio Jozo Križanović i pitao, **piše li i gdje piše SDP ?**

Na to je replicirao Zorić Vinko istakavši, **da svoju prostoriju nema jedan predsjedavajući komisije kao npr. gosp. Martin Raguž, dok neki predsjedavajući komisija imaju svoje prostorije!**

Nakon ovog iznesenog podatka, predsjedavajući Munib Jusufović je zatražio od Hadžović Vedrana, **da objasni, koji predsjedavajući komisija imaju svoje prostorije.**

Hadžović Vedran je odgovorio, da svoje prostorije imaju svi predsjedavajući.

Na ovaj podatak, replicirao je Munib Jusufović istakavši, **da on kao predsjedavajući Administrativne komisije nema svoje prostorije.**

Zorić Vinko je ponovo naglasio, da će on opet podnijeti zahtjev ispred Kluba HDZ-Demokršćani, budući da Snimak prostora koji je dostavljen Administrativnoj komisiji nije tačan.

Munib Jusufović je nakon ove diskusije **konstatovao, da Klub HDZ-Demokršćani nema nikakav prostor.**

Nakon ove konstatacije Zorić Vinko je istakao, da **obzirom na ovakvo stanje sa prostorom, Klub ne drži sjednice nigdje.** Ukazao je i na stanje izazvano odlukama Visokog predstavnika, kad se radi o finansiranju rada Klubova ističući, da je **Visoki predstavnik** Nalogom kojim se obustavljaju sve isplate sa utvrđenih budžetskih pozicija za stranačko finansiranje HDZ-a; ("Sl.glasnik BiH" br.: 12/04) i Odlukom kojom se obustavljaju sve isplate sa utvrđenih proračunskih pozicija za stranačko finansiranje SDS-u i kojom se izdaje nalog SDS-u za podnošenje finansijskog plana za period od 01. januara 2003 do 31. marta 2004 godine; ("Sl.glasnik BiH" br.: 14/04) **obustavio novac za stranke, a ne novac za rad Klubova.**

Ivo Miro Jović je također iznjeo svoje mišljenje po pitanju odluka Visokog predstavnika **istakavši, da se iste ne odnose na rad Klubova.**

Vezano za ovo pitanje, koje se pojavilo u vezi sa ovom tačkom dnevnog reda i mišljenje svih prisutnih na sjednici, da bi bilo logično da se citirane odluke Visokog predstavnika ne odnose na sredstva namijenjena za rad Klubova, budući da je njihova djelatnost usko vezana sa radom Parlamentarne skupštine Bosne i Hercegovine, a što je i utvrđeno Poslovníkom Predstavničkog doma Parlamentarne skupštine Bosne i Hercegovine ("Sl.glasnik BiH" br.: 20/00), predsjedavajući Munib Jusufović je predložio da bi u tom smislu se trebalo dati ispred Administrativne komisije

TUMAČENJE

Odluka Visokog predstavnika o reduciranju sredstava stranaka, ne odnosi se na sredstva za rad Klubova poslanika.

Predloženo tumačenje je jednoglasno prihvaćeno od svih prisutnih na sjednici Administrativne komisije.

te na osnovu naprijed navedenog donijeti

ODLUKU

I-Nalog kojim se obustavljaju sve isplate sa utvrđenih budžetskih pozicija za stranačko finansiranje HDZ-a, ("Sl.glasnik BiH" br.: 12/04) i Odluka kojom se obustavljaju sve isplate sa utvrđenih proračunskih pozicija za stranačko finansiranje SDS-u i kojom se izdaje nalog SDS-u za podnošenje finansijskog plana za period od 01. januara 2003 do 31. marta 2004 godine ("Sl.glasnik BiH" br.: 14/04) koje je donio Visoki predstavnik, ne odnose se na reduciranje sredstava namijenjenih za rad

1. Kluba HDZ-Demokršćani;
2. Kluba Srpske demokratske stranke,

Predstavničkog doma Parlamentarne skupštine Bosne i Hercegovine, pa se istim imaju izvršiti isplate za opravdane troškove vezane za rad Klubova, uključujući i direktne isplate dobavljačima roba i usluga.

II-Za izvršenje ove Odluke, zadužuje se Računovodstvo Sekretarijata Parlamentarne skupštine Bosne i Hercegovine.

Odluka je jednoglasno prihvaćena od svih prisutnih na sjednici Administrativne komisije.

Što se tiče prostorija, iznjeo je mišljenje, da u vezi sa dodjelom istih, trebaju biti utvrđeni prioriteti. **Broj poslaničkih mandata bi trebao biti kriterij za dodjelu istih.**

U raspravi je ponovo uzeo učešća Hadžović Vedran, koji je naglasio, da po ovom pitanju jedino Mješoviti klub poslanika za sada nema na raspolaganju niti jednu prostoriju, već mu je na raspolaganje data Biblioteka, s tim da je bibliotekar, u toku rada Kluba, obavezan napustiti prostoriju Biblioteke i time omogućiti neometan rad Kluba. Posebno je naglašeno da, pored činjenice da nema slobodnog prostora koji bi se mogao dati na raspolaganje za rad Klubova, taj **problem je prisutan i kad se radi o radnim prostorijama za službenike** budući da neki sjede u prostoru koji nema prozora. Istakao je, da on trenutno ne vidi način kako bi se obzirom na ovakvo stanje mogao riješiti ovaj problem.

Nakon ovog obrazloženja i sveobuhvatne rasprave po ovoj tački dnevnog reda, Munib Jusufović je naglasio, **da je na sjednici Administrativne komisije konstatovano da, nedostaju dvije prostorije kojim bi se rješilo ovo pitanje.** U skladu sa navedenom konstatacijom, Administrativna komisija je **jednoglasno usvojila**

ZAKLJUČAK

Obavezuje se Kolegij Predstavničkog doma, Parlamentarne skupštine Bosne i Hercegovine, da zajedno sa Ministarskim vijećem, u roku od 7 dana, riješi pitanje nedostatka dvije slobodne prostorije potrebne za rad Mješovitog kluba poslanika i Kluba HDZ-Demokršćani.

Ukoliko u navedenom roku Kolegij neriješi ovo pitanje, Administrativna komisija će utvrditi kriterije za dodjelu prostora za rad Klubova, na osnovu broja mandata i po takvim kriterijima će izvršiti preraspodjelu trenutnog prostora.

AD-4 Administrativna komisija je, po ovoj tački dnevnog reda, jednoglasno donijela

ODLUKU

I-Muberi Ušanović, poslaniku u Predstavničkom domu, odobrava se naknada za odvojeni život od porodice u iznosu od 400,00 KM mjesečno i naknada za zakup stana do 500,00 KM mjesečno, kao i pravo na naknadu troškova prijevoza, četiri puta mjesečno, do mjesta prebivališta njene porodice.

II-Visina naknade za zakup stana regulisat će se ugovorom o zakupu.

III-Odluka stupa na snagu danom donošenja, a primjenjivat će se od 01.06.2004 godine.

AD-5 U okviru ove tačke dnevnog reda, Administrativna komisija je jednoglasno usvojila

ZAKLJUČAK

Razmatranje Izvještaja o izvršenju budžeta za period januar-maj 2004 godine odgađa se za narednu sjednicu Administrativne komisije.

Administrativna komisija smatra, da je po ovom pitanju potrebno sazvati posebnu sjednicu Administrativne komisije, na kojoj bi se razmotrila probijanja troškova i dali konkretni prijedlozi mjera koje treba poduzeti.

U okviru ove tačke dnevnog reda, **Vedran Hadžović je predložio Administrativnoj komisiji da donese zaključak**, kojim se upućuje pitanje Vijeću ministara, kada će se početi sa radovima na neboderu.

Zbog neodložnih obaveza pojedinih članova Administrativne komisije prema drugim komisijama koje su također imale zakazane svoje sjednice, rasprava po pitanjima istaknutim u okviru ove tačke dnevnog reda odgođena je za narednu sjednicu Administrativne komisije.

Sjednica je završena u 14,30 sati.

Sekretar
Administrativne komisije
Davora Čaplinski

Predsjedavajući
Administrativne komisije
Munib Jusufović